

續金華叢書



續金華叢書



金華黃先生文集卷第二十八

續稿二十五

續金華叢書

碑

臨川危素編次

番禺劉耳校正

勅賜康里氏先塋碑

康里氏三葉疏王封者六人踐相位者四人咸有石章以紀勲德而其塋域在京城和義門之外者顧未有以表于封樹至正八年冬十一月十有二日皇帝御明仁殿中書宰臣用今大司農達世貼睦邇之請以聞詔臣某爲之銘以達世貼睦邇素善書有旨就令書丹別勅平章政事議中書省事姚庸篆其額以賜焉臣潛忝以非才待罪大史氏職在論撰不敢控辭康里古高車國也我太祖皇帝親征而略其地其國之近屬有二孤子曰曲律日牙牙其母古麻里氏賢而有識以二子寘褚中負以橐駝而來朝則太祖已賓天乃以二子獻于太宗曰此吾國之遺胤也不可爲人所得而辱於奴隸敢以來歸幸他日爲天子使上憐而撫育之暨憲宗御極二子旣長召入宿衛領昔寶赤遂扈從伐宋母回康里而復來值憲宗陟方諸將皆北還

二子獨後禱于神祠若有稱好者再問而知爲吉兆比至家則二子亦至矣世祖皇帝入正大統疇其勞績給以土田人戶俾居興和天城之大羅鎮母後以牙牙子貴追封雲中郡夫人牙牙贈宣忠翊德開治功臣開府儀同三司上柱國追封雲中王諡□□配忽都台氏封邢國夫人繼桓答氏封康國太夫人丞相順寧忠列王阿沙不花丞相和寧忠獻王亦納脫脫皆雲中□□王之子丞相冀寧文忠王鐵木兒達識則和寧忠獻王之子也順寧忠列王年十四入侍世祖以占對詳明特見親幸令門者勿納以試之遂由水竇而入上嘉其志乃命聽其出入無禁嘗早朝露未晞跣行而前上望見尤歎異焉使掌門衛以察非常久之以西手千戶領昔寶赤從成宗北征與海都戰數有功入爲大宗正府也可札魯忽赤浙西豪民朱清張瑄以海運取顯官有罪抵死王奉旨簿錄其家一無所私詔賜王宅一區鈔萬五千緡命兼兩兵馬指揮司達魯花赤姦軌不作輦下肅清武宗卽皇帝位拜中書平章政事軍國大事並聽裁決尋加特進大尉

依前平章政事有盜內府金者王退朝適與之遇訝其倉惶失措詰之果得黃金五十兩白金百兩上命以金賜王而誅盜王辭曰盜誠當誅金非臣所宜得請入金贖盜罪上爲貸其死有旨出內府鈔十五萬緡賞蹴踘者王力持不可訖弗予一日入侍於五花殿觀上玉色而進薄滋味寡嗜欲之戒上嘉其忠忱命進酒王曰陛下旣納臣言而復以酒進是臣言不足取信也上爲罷酒進中書右丞相御史大夫尋復爲平章政事加錄軍國重事兼廣武康里衛親軍都指揮使封康國公遷知樞密院事薨享年四十有七贈純誠一德正憲保大功臣太師開府儀同三司上柱國中書右丞相追封順寧王諡忠烈配達海的斤氏追封順寧王夫人孛羅眞氏別哥倫氏並封順寧王太夫人和寧忠獻王少從其兄幹禿蠻獵於燕南幹禿蠻使獻所獲世祖皇帝見其骨氣沈雄步履莊重卽命入宿衛暨武宗撫軍朔方王在行間與諸將大敗海都軍于杭海手斫一士之首連背胛以獻武宗壯之兵之始交也武宗銳欲策馬出戰王執其轡力諫上怒

揮鞭扶其手不退上不得已而後止與諸將朶兒答哈語及之朶兒
答哈曰太子在軍中如身有首如衣有領脫有不虞衆安所附脫脫
之進諫可謂忠矣上深然之成宗大漸丞相哈剌哈孫答剌罕稱疾
卧直廬中王適以使事至京師乃俾馳告武宗以國恤且勸進安西
王乘間入朝窺伺神器旣而仁宗奉太母至自懷孟忠烈諜知姦黨
謀僞賀千秋節而舉事亟白于仁宗先二日而發內難悉平武宗聞
太母詢所宜立於陰陽家遣王還察事機時太母以武宗遲廻不至
已命忠烈往道宗室諸王貴戚元勳推戴之誠忠烈至野馬川上見
之甚喜行次旺古察而王繼至趣使疾驅與之共載聞王致太母及
仁宗之語乃大感悟釋然無疑暨忠烈還報仁宗卽日命駕奉迎于
上都武宗皇帝正位宸極尊太母爲皇太后立仁宗爲皇太子三宮
協和而無間言王兄弟之力也先是武宗嘗命王同知樞密院問曾
視事否王對曰今正殿未御宗親未見德音未下而扈從之臣攬取
名位失四方之觀瞻寧不上累聖德是以未敢祗事上嘉歎不已知

樞密院只兒哈忽侍上於潛邸嘗有不遜語將寘于法王諫曰陛下
新卽位大信未立而輒行誅戮知者以爲彼自有罪不知者以爲報
仇恐人人自危況只兒哈忽習於先朝故典今固不可少也上乃宥
之上京大宴故事命一近臣敷宣王度以爲告戒王薦只兒哈忽令
具其言以進果稱旨上歎曰博爾朮博爾忽前朝人傑脫脫乃今世
人傑也卽以所進之言授王及諸王大臣被宴服就列王卽席陳西
北諸藩始離終合之由去逆效順之義聽者莫不傾服王自同知樞
密院事中書平章政事拜御史大夫遷南臺御史大夫召拜錄軍國
重事中書左丞相知無不言言無不行人以賢相稱之尙書省立以
王爲右丞相王辭曰爵賞者帝王所以用人也今爵及比德賞及罔
功緩急之際何所倚賴乎中書所掌錢糧工役選法刑獄十有二事
若從臣言恪遵舊制則臣願與諸賢黽勉從事不然用臣何補上乃
爲下令俾濫受宣勅者赴所屬繳納僥倖之路旣塞奔競之風頓衰
中臺有贓罰鈔五百萬緡王請出以賑孤寡老疾諸窮而無告者莫

不舉手加額宗王南忽里部人告其主爲不軌王辨其誣抵告者罪
宗王牙忽禿徵其舊民於齊王入不沙部中鄰境諸王欲奉齊王攻
牙忽禿齊王懼奔牙忽禿以避之遂告齊王反王簿問得實釋齊王
徙諸王于嶺南邊將脫火赤請以新軍益宗王丑漢廷議俾王往給
其資裝王言時方寧謐不宜挑變生事辭不行遂遣丞相禿忽魯平
章政事也先帖木兒往給之事幾以激變尋復爲中書左丞相仁宗
眷之彌篤欲使均逸于外拜江浙行中書省左丞相下車伊始進父
老問以利病咸謂杭城故有便河達于江潯湮廢已久若疏鑿以通
舟楫物價必平僚佐或難之王曰吾陛辭之日密旨許以便宜行事
民以爲便行之可也俄有旨禁勿興土功王曰敬天莫先勤民民蒙
其利則灾沴自弭土功何尤不一月而訖工人至今便之王以疑似
召赴闕杭民數萬號慟遮道不得前既至賴仁宗察其無他厚賜而
遣之還鎮王至杭未幾遷江西行中書省左丞相英宗嗣位召拜御
史大夫帖赤陰忌之奏改南臺御史大夫復喉言者劾其擅離職守

將徙之雲南會帖赤伏誅乃解王家居不出者五年泰定四年二月
二日薨享年五十有六王階至開府儀同三司勳上柱國爵爲馮國
公兼官爲集賢使仁虞使中都留守司達魯花赤開寧路總管府達
魯花赤領崇福司回回司天臺中衛廣武衛親軍都指揮使贈推誠
全德守義佐運功臣太師中書左丞相階勳皆如故追封和寧王諡
忠獻配也先氏封馮國夫人武宗又妻以畏兀氏月魯忽圖仁獻章
聖皇后之同乳也封薊國太夫人冀寧文忠王以大臣子事明宗於
潛邸宏才雅量好學下士夙負公輔之望歷事累朝由同知都護府
事爲工刑兩部侍郎擢監察御史遷秘書除禮部尙書遂參議中書
省事擢西臺侍御史未行留爲奎章閣侍書學士除大都留守遷同
知樞密院事上旣總攬權綱用脫脫爲中書右丞相王爲右丞以更
新庶政科舉之廢也王在參議府爭之不得訖不署其奏牘至是力
爲上言前代科舉得人之盛遂復行焉金山大雪上遣王及知樞密
院衆家奴齎鈔一千萬緡衣表裏各二萬疋往周給之王被命卽行

雖戰塚無所憚拜中書平章政事每入直上爲御宣文閣詢以治道
往往至夜分乃退上親祀南郊王言熙事慶成宜均惠于下詔賜民
明年田租之半嶺北地寒不宜稼歲飢賑以鈔無從糴王請轉京倉
米百萬石貯和寧由是備先具而民不告病兩浙閩廣鹽額累增而
課愈虧王請歲減十萬引以紓亭戶之力中政近臣謀發蕃舶規取
息王言與商賈爭利恐遠夷得以窺中國事遂已日本海商百餘人
遇風漂入高麗表請沒入其人於有司以爲奴王以爲天子一視同
仁四方皆吾赤子豈可乘人之險以爲利宜資其還上從之日本果
上表稱謝無何日本有僧告其國遣人至京師刺探國事王曰刺探
者在敵國固有之今六合一家何以刺探爲果有其人正可令覩中
國之盛歸告其國人使知嚮慕旁觀稱歎曰真天朝宰相之言也拜
御史大夫務以靜重持大體不爲苛矯以立聲威建言近歲大臣獲
罪重者族滅輕者猶籍其妻孥祖宗聖訓父子罪不相及請除其法
上從之遂著爲令飢民集于輦下奏出贓罰鈔糴米萬石卽近郊寺

觀爲庶以哺之所活不可數計居歲餘復爲平章政事進位次於端揆大駕時巡留鎮大都舊法細民糴於官倉出印券月給之者其直斗三百文謂之紅貼米賦籌而給之盡三月止者其直斗五百文謂之散籌米豪民貪夫得買其籌貼以爲利王請別發米二十萬石遣官坐市肆使人持五十文卽得米一升姦弊遂絕民蒙其惠乞解政柄不允拜錄軍國重事中書左丞相領經筵事王入則告上以帝王之道出則正紀綱修法度奏立內外通調之制朝臣外補許得陛辭上親臨遣責以成效郡邑賢能吏亦次第甄拔分海漕米四十萬石置沿河諸倉以備凶荒先是朝廷患僧徒擁厚貲事兼并抑使與齊民均受役于官柄國者右之法遂中變王奏復其舊延登故老俾預大議旁求遺逸待以不次之擢加孔子後嗣襲者秩二品歲一再詣國庠進諸生而獎勵之使士咸知勸王天性忠直學術正大剴裁庶務片言立決重輕予奪各適其宜上嘗問爲治何先王對曰莫先於法祖宗上因稱王文統爲奇才而有不同時之歎王前奏曰世祖皇

帝行仁義而文統輔以功利此所以爲世祖之罪人也使文統復生於今猶當遠之何足關聖念乎蓋王於書無不讀尤喜聞儒先性理之說而明於義利之辨相業之隆實基於此從幸上京還入政事堂甫一日暴得危疾上命近臣挾名醫狎至疾已不可爲以至正七年九月十八日薨享年四十有六葬以其月二十六日上命有司護其葬仍給賻鈔二十五萬緡兩宮皇后及太子致賻有差階至開府儀同三司勳至上柱國兼官爲昔寶赤右手萬戶左阿速親軍宣忠幹羅思親軍都指揮使司達魯花赤提調留守司武衛太醫院廣惠司寧徽寺事贈開誠濟美同德翊衛功臣太師中書右丞相階勳皆如故追封冀寧王諡文忠配曲出氏追封冀寧王夫人執政大臣言相位不可久虛上曰鐵木兒達識有兼人之才後難爲繼朕當徐思之金山札尼別使者入見上顧謂知樞密院阿吉剌曰鐵木兒達識籌邊事皆與朕意合斯人豈可復得哉因俛首太息不已按康里氏世譜雲中王之配邢國夫人生四子曰孛別舍兒曰和者吉贈推忠宣

力保德佐運秉義功臣太保開府儀同三司上柱國追封榮王諡忠武曰不別遥授甘肅行省右丞日幹禿蠻繼康國太夫人生二子一不子則忠烈忠獻兩王也忠烈子男二長海亦兒順寧府達魯花赤次伯嘉納前尹京時平反海商被誣爲盜者所活一百十六人累遷中政院使女一也里八思密適失上都兵馬都指揮使亦思馬因封雲中郡君孫男一託和直女二忠獻子男九長霸都仁虞都總管府達魯花赤贈禮部尙書次卽冀寧文忠王次玉樞虎兒吐華同知樞密院事次達世貼睦邇嘗以平章政事行省江浙首行視忠獻所浚杭城便河而除治之父老多忠獻之遺民無不感泣入爲大司農拜銀青榮祿大夫湖廣等處行中書省平章政事次哈答不花次阿魯輝帖木兒皆早卒次脫烈太府太監次哈達帖木兒太都副留守次汪家閭同僉資政院事女八長哈達忽都魯適衛王闊博次帖木倫適侍禮部侍郎不花次亦老適集賢大學士兼內史豐國公怯烈該次伯忽都魯適大宗正府也可札魯忽赤卓思丹朶兒只次乞刺沈

控適諸王蠻子次脫脫倫適中書刑部侍郎保保脫脫倫卒次保僧
繼之次不魯罕忽里早卒蓋忠獻九子惟文忠及湖廣行省平章政
事薊國太夫人出也孫男十女七文忠之男二長拔都兒襲領昔寶
赤次天保奴女三長別的斤適中政院判官三閭次完者提斤適衛
王子吉剌失八次的斤玉樞虎兒吐華之男一紐鄰女口達世貼睦
邇之男一瓦咱刺失理女一招童脫烈之男二長壽安次某哈達帖
木兒之男二長萬次某女口汪家閭之男一博羅帖木兒曾孫男口
女口拔都兒之男二長禿魯仁虞都總管府達魯花赤次完者帖木
兒海口屯儲侍衛親軍都指揮使始忠獻嘗建書院于順寧宣平宮
家莊之別墅賜額景賢後卽其中爲忠獻文忠兩祠堂春秋有事於
先聖先師則侑食焉忠烈忠獻兩王異母兄之子孫惟榮忠武王之子
燕不憐燕八思提別不花伯撒里爲最顯燕不憐卒官遼陽行省平
章政事太保興國公贈推誠效節佐運翊亮功臣太師開府儀同三
司上柱國追封興寧王諡忠襄燕八思提大司農別不花嶺北行省

平章政事伯撒里由御史大夫累遷江浙行省左丞相餘皆至大官
莫得而殫紀也臣潛欽惟太祖皇帝肇基朔漠世祖皇帝統一方夏
溥天率土共惟帝臣傑出其間而膺國家之重任者固非一族有若
康里氏之先老母弱子不絕如綫祖宗所以長育成就之以詒燕于
後人者天實佑之豈偶然哉一門三相豐功茂烈未易以筆舌擬諸
形容今獨取其關於祖宗之安危民生之休戚者序次而顯誌之乃
若今大司農之尊君親上好賢樂善發其素蘊紹休前人珪傳祖襲
方興未艾屢書不一書是在後之秉史筆者銘曰

山川出雲膚寸之微縣縣瓜瓞天實培之猗康里氏家有賢母保其
遺孤克開厥後有相之道俾熾而昌蟬聯奕葉四相六王相業之傳
由忠烈始惟王忠獻厥績愈偉被堅執銳出從撫軍佩玉瓊琚入侍
嚴宸塤麓伯仲股肱左右奔走後先獻替可否陽九之厄國有危疑
民心靡止孰爲龜筮桓桓忠烈乃心帝室明柄幾先不俟終日繼以
忠獻載驅載馳風騰雲躍夾日以飛大憝廓清德音布濩九廟尊安

三宮悅豫天子有命忠獻是膺乃位談輔以秉國成百度惟貞六服
承德寧有一夫不被其澤帝旒南服爰資保釐克勤小物靡有遐遺
秉其忠貞夷險一節高朗令終休有餘烈積慶儲祉昇于文忠世濟
其美乘時奮庸細書金匱談經蘊屢堯舜其君貴王賤霸咨詢故老
延登逸民量能授任內外惟均懷柔遠人務全國體威行惠孚無間
遠邇垂紳正笏泰山四維天胡弗憖當宁興思大事之書厥有顯冊
史臣奉詔表此幽窆

翰林學士承旨致仕脫脫公先塋碑

國朝之制官登七品始推恩於二親位極一品乃追榮于三代觀夫
世數之遠邇品級之崇卑則前人積累之功有可得而徵者矣傳所
謂德厚者其流光德薄者其流卑詎不信哉重紀至元之五年某月
有制翰林學士承旨脫脫曾祖默而吉台贈中奉大夫江浙等處行
中書省參知政事護軍追封范陽郡公曾祖母哈敦追封范陽郡夫
人祖吾都兒贈資善大夫江西等處行中書省右丞上護軍追封范

陽郡公祖母夾谷氏追封范陽郡夫人父故任忠顯校尉平江路吳縣達魯花赤帖古迭兒贈榮祿大夫河南江北等處行中書省平章政事柱國追封冀國公母朶羅以氏臧氏俱追封冀國夫人煌煌命書下飾泉壤而碑石未建君賜弗彰至正十年夏四月天子坐興聖殿東便殿翰林學士承旨臣哈刺八都兒臣拜拜以爲言得旨命翰林侍講學士臣潛爲之銘宣徽使臣三旦八書其文集賢侍講學士臣期頤篆其額俾刻焉臣謹按脫脫公系出蒙古默而吉台氏世居范陽金季中原俶擾先世兩郡公皆晦迹弗耀而能以善及人有陰被其惠而不自知者垂休委祉逮於冀國仕皇朝歷昌平寧陵穰吳四縣達魯花赤宦轍所屆政譽翕然而未足以展其素蘊已試之效特泰山之毫芒耳是以脫脫公起而承之由某縣達魯花赤爲大都路兵馬都指揮使擢大宗正府郎中出爲江西等處行中書省左右司郎中累遷潭州路達魯花赤邵武路總管召拜吏部尙書尋由治書侍御史升侍御史進御史中丞領侍儀司事出爲陝西諸道行御